

## **KERATAN AKHBAR**

TARIKH : 30 NOVEMBER 2023  
AKHBAR : ASTRO AWANI  
PAUTAN :<https://www.astroawani.com/berita-malaysia/kertas-putih-dasar-gaji-progresif-dibentang-hari-ini-448118>

### **Kertas putih dasar gaji progresif dibentang hari ini**



Pembentangan ini akan menerangkan secara terperinci berkaitan dengan asas-asas dan mekanisme pelaksanaannya.  
- Foto fail/BERNAMA

KUALA LUMPUR: Kertas putih cadangan dasar gaji progresif akan dibentangkan di Dewan Rakyat hari ini.

Pembentangan ini akan menerangkan secara terperinci berkaitan dengan asas-asas dan mekanisme pelaksanaannya.

Sebelum ini Menteri Ekonomi Rafizi Ramli dilaporkan berkata, peruntukan pelaksanaan rintis gaji progresif untuk pekerja dan syarikat swasta awalnya telah dimasukkan di dalam Belanjawan 2024 di bawah Kementerian Ekonomi.

Jelasnya, ini adalah kali pertama kerajaan campur tangan secara terus untuk meningkatkan gaji sektor swasta.

Projek rintis pelaksanaan gaji progresif akan dilaksanakan pada 2024, bagi menilai keberkesanan dan ketersediaan dasar tersebut.

Ia membabitkan 1,000 syarikat yang memenuhi syarat kelayakan dengan pekerja bergaji antara RM1,500 dan RM4,999.

Projek rintis ini bagi mengekalkan momentum tumpuan kerajaan kepada persoalan gaji rakyat.

Jelas Rafizi lagi, keputusan yang dibuat ialah pelaksanaannya perlu melibatkan kesemua pihak dan digerakkan sebagai langkah bersama satu negara.

Dasar gaji progresif dibuat bagi membantu negara mencapai sasaran bahagian pampasan pekerja sebanyak 45 peratus dari Keluaran Dalam Negara Kasar (KDNK) dalam tempoh 10 tahun.